



numèro **101**


● *Auton e Ivèrn de 2010* • 5 €

Pour une Occitanie fédérale et démocratique

LO LUGARN-LOU LUGAR

Tribuna per l'Occitània liura • Partit de la Nacion Occitana

N° ISSN: 0399 – 192 x



Mapa de l'Occitània federala

Las tres etapas de l'emancipacion nacionala occitana

per Joan-Pèire Alari



E
d
i
t
o
r
i
a
l

Lo **Partit de la Nacion Occitana** tenguèt son Conselh Nacional biannal los 6 e 7 de novembre de 2010 a Montalban (Tarn e Garona) en preséncia de militants de maitas regions d'Occitània e dels sòcis d'onor catalans venguts especialament de Barcelona.

Lo **Partit de la Nacion Occitana** existís dempuèi 50 ans. Perqué parlar de nacion per Occitània? Pr'amor son fundador, Francés Fontan, pensava que l'existéncia d'una lenga determina l'existéncia d'una nacion. I a una lenga occitana, dins sa varietat dialectala, donc i a una nacion occitana. Pertot ont i a una lenga indigèna, i a una nacion. Aquel principi es valable dins lo mond entièr.

Per consequent, França es un Estat plurinacional compausat de las nacions francesa, bretona, basca, catalana, occitana, còrsa, neerlandesa (Flandes) e alemanda (Alsàcia e Lorena tiesa). Mas Occitània que compren lo terç Sud de l'Estat francés, lo Val d'Aran de l'Estat espanhòl e las valadas alpinas occitanas del Piemont en Itàlia, a pas cap de reconeissença oficiala dins la Republica francesa. Per contra, lo Val d'Aran gausís d'un estatut d'autonomia dins lo sen de la Generalitat de Catalonha enclusa dins l'Estat espanhòl e l'occitan i es lenga co-oficiala amb l'espanhòl e lo catalan.

Lo **Partit de la Nacion Occitana** a per tòca l'emancipacion de la nacion occitana per etapas. La primièra etapa passarà per un renfortiment considerable dels poders de las regions occitanas en França. Devon en particular aver lo poder de levar l'impòst coma lors vesinas basca e navarrenca en Espanha e de se regropar per trabalhar amassa e abandonar las rivalitats damatjoses que fan lo jòc del centralisme parisenc (per exemple Bordèu contra Tolosa o Marselha contra Niça).

La reforma territoriala que ven d'èsser adoptada pel Parlament francés, en mai que siá pauc legibla e que lo mòde d'eleccion dels conselhièrs territorials futurs amb una barra de 12,5 del cent, siá fach per eliminar los pichons partits (donc nosautres) e renfortir lo senhorejament UMP-PS, va pas dins lo sens soetat per lo **Partit de la Nacion Occitana** que de mai se ditz per la supression dels departaments, lor remplaçament per los païses istorics e la creacion de collectivitats novèlas per los catalans dels Pirenèus orientals e los bascs dels Pirenèus atlantics.

La segonda etapa passarà per l'autonomia intèrna de l'Occitània « francesa » dins l'encastre d'una Republica francesa federala.

La tresena etapa, a tèrme long, que pòt paréisser una utopia mas que es del tot realizabla, serà la reunificacion d'Occitània, escartairada entre Espanha, França e Itàlia, e la creacion d'una Republica federala occitana donc d'un Estat occitan, membre de l'Union europèa e de l'ONU.

Nos inscrivèm dins aquel grand corrent d'emancipacion en Euròpa e anam cotria amb los bascs, los catalans, los escoceses e los flamencs de Belgica e dins lo mond amb los tibetencs, los curds, los berbèrs eca. Aquelas tòcas, segon lo **Partit de la Nacion Occitana**, pòran sonca èsser agandidas per de vias democraticas e pacificas, çò que implica per sos militants de trabalhar sul terren per

convéncer los occitans e de se presentar tan sovent coma possible a las eleccions, sols o preferentament en aliança amb d'autres fòrças occitanas independentas dels partits politics franceses de tal biais que conquisten lo poder dins las regions occitanas. Devèm venir los concurrents dels partits politics franceses e non pas una fòrça complementària. Lo **P.N.O** pòirà jogar un ròtle significatiu dins la realizacion d'aquelas tòcas sonque se mena a bona fin son processús de renovacion que passarà especialament per l'arribada d'una novèla generacion de militants e de militantas de totes edats per escambiar la pagèla amb los dirigents istorics. Pel moment, lo **Partit de la Nacion Occitana** perseguirà son accion al prèp dels elegits de las comunas, de las comunautats de comunas, dels conselhs generals e de las regions per que impulsen de politics lingüísticas ausardas en favor de l'occitan mas tanben per que sostengan e promògan, en foncion de lors mejans, l'economia de nòstres païses e de nòstras regions. Per çò qu'es de la polemica sul bilingüisme francés-occitan que d'unes jutjan tròp pauc ambiciós, lo **Partit de la Nacion Occitana** pensa que aquel bilingüisme pòt pas èstre que transitòri, que l'occitan a de venir a tèrme lenga nacionala prioritària e lo francés una lenga estrangiera demest las autras .

Lo **Partit de la Nacion Occitana** sosten a l'encòp las classes bilingüas de l'Educacion Nacionala e l'ensenhament de l'occitan per immersion dins las escòlas « calandretas » que pòdon èstre l'embrion de la futura educacion nacionala occitana. Dempuèi 2008, la **Constitucion francesa reconeis las lengas regionalas**, donc l'occitan, coma formant part del patrimoniu de França. Es un progrès mas aquò sufís pas, **cal que la lei revèrte en practica aquel principi constitucional**. Coma lo govèrn actual sembla pas decidit a tènèr sa promessa de dos ans fa de far votar pel Parlament una lei sus las lengas regionalas, maites deputats de totes tendéncias an elaborat, amb las associacions, **una proposicion de lei sus las lengas regionalas** , Cal que contunhen de la menar amassa per que siá adoptada lèu lèu.

En cò de nòstres vesins, lo **Partit de la Nacion Occitana** se regaudís del passa carrièra gigant de Barcelona en julhet passat per l'auto-determinacion de Catalonha tanplan coma de la capitada de las consultas popularas organizadas dins las comunas catalanas que mostrèron que los catalans vòlon en massa l'independéncia. Çò que lo **Partit de la Nacion Occitana** desira per Occitània e Catalonha, o desira tanben per totes las nacions sens Estat del monde al nom de çò qu'apelam l'etnisme, valent a dire un nacionalisme internacionalista. Mas mai que tot, Lo **Partit de la Nacion Occitana** saluda l'iniciativa del Parlament catalan de Barcelona que rendèt l'occitan aranés oficial dins tota la Catalonha. Es un bèl exemple de democracia lingüística de la part de nòstres cosins catalans que lo govèrn francés deuriá seguir. Fa que que podèm pas far autrament que de denonciar las manòbras de las fòrças centralistas de Madrid, en particular lo Tribunal constitucional espanhòl que remèt en causa d'aspèctes fundamentals del novèl estatut d'autonomia votat pel Parlament de Barcelona e que indirèctament amenaça çò aquesit per la Val d'Aran. Aquela a un govèrn autonòm, un cas unic en Occitània. Los araneses nos mòstran lo camin de seguir.

22 de novembre de 2010